

07 OCT 2003
OIC-Peranan
IDFR ANJUR PERSIDANGAN MENGENAI UMMAH

PETALING JAYA, 7 Okt (Bernama) -- Satu persidangan antarabangsa mengenai Ummah dan peranan Pertubuhan Persidangan Islam (OIC) akan diadakan di Pusat Dagangan Dunia Putra pada 13-14 Okt sempena Sidang Kemuncak OIC ke-10.

Persidangan yang akan dirasmikan oleh Timbalan Perdana Menteri Datuk Seri Abdullah Ahmad Badawi itu dianjurkan bersama oleh Institut Diplomasi dan Hubungan Luar Malaysia (IDFR), Institut Pengembangan Ilmu (InKA), Universiti Teknologi Mara (UiTM) dan Persatuan Bekas Pelajar MRSM Malaysia (ANSARA).

Ketua Pengarah IDFR Datuk Dr Mohd Yusof Ahmad berkata persidangan bertema "Ummah di Persimpangan Jalan: Peranan OIC" itu diadakan untuk membincangkan isu-isu yang menjejaskan dunia Islam terutamanya pada zaman mencabar sekarang.

"Media dunia tidak memberikan liputan positif mengenai Islam dan orang Islam...jadi dengan mengambil kira pentingnya isu itu, perlu ada perbincangan mengenai perkara ini dan kemajuan Islam," katanya pada sidang media di IDFR di sini.

Dr Mohd Yusof berkata persidangan itu akan dikendalikan oleh cendekiawan dan tokoh terkemuka dunia Islam yang akan membincangkan tema utama iaitu isu-isu representasi, globalisasi dan warisan, pentadbiran, undang-undang dan hubungan antarabangsa, ekonomi politik dan media, pendidikan dan jantina.

Persidangan itu akan diakhiri dengan sesi pleno dan perakuan resolusi.

Dr Mohd Yusof juga berkata persidangan itu akan menyediakan forum bagi para intelektual dan cendekiawan Islam untuk berkongsi pendapat dan merumuskan strategi bagi Ummah yang lebih baik.

Ia juga akan membantu menjelaskan dan membincangkan bidang-bidang kepentingan bersama antara Islam dan tamadun lain serta mengusahakan proses untuk merapatkan jurang antara tamadun.

Kira-kira 350 peserta terdiri daripada pakar akademik, pegawai kanan kerajaan dan pemimpin korporat, termasuk kira-kira 100 perwakilan asing dijangka menghadiri persidangan itu.

Dr Mohd Yusof berkata antara penceramah ialah Raja Nazrin Shah Sultan Azlan Muhibbuddin, Prof Dr Amer Al-Roubaie dari Universiti Islam Antarabangsa, Dr Chandra Muzaffar dari Just World Trust for Peace, Prof Datuk Dr Osman Bakar (Fellow, Centre for Muslim-Christian Understanding, Georgetown University), Dr Haroon Siddique (The Toronto Star, Kanada) dan Prof Mohammad El-Sayed Selim (Universiti Kaherah, Mesir).

Yang turut hadir pada sidang kedua itu ialah Penolong Naib Canselor UiTM dan ketua InKA, Prof Madya Dr Rahmat Mohamad dan Presiden Ansara Datuk Mukhriz Mahathir.

-- BERNAMA
RV AHH AAM RHM